



SÓKNARÁÆTLUN
VESTFJARÐA

UPPBYGGINGARSJÓÐUR

Verklags- og úthlutunarreglur við úthlutun styrkja úr Uppbyggingarsjóði Sóknaráætlunar Vestfjarða

1. Tilgangur

Tilgangur Uppbyggingarsjóðs er að styrkja menningar-, atvinnu- og nýsköpunarverkefni á Vestfjörðum.

2. Samkeppnissjóður

Uppbyggingarsjóður er samkeppnissjóður þar sem fagmennska og gæði verkefna og umsókna eru lögð til grundvallar við úthlutun. Umsóknir eru metnar út frá markmiðum og áherslum sem fram koma í Sóknaráætlun Vestfjarða 2015-2019, samningi um Sóknaráætlun Vestfjarða 2015-2019 sem undirritaður var 10. febrúar 2015 og skilyrðum sem birtast í þessum reglum.

3. Úthlutunarnefnd:

Fjórðungsþing Fjórðungssambands Vestfirðinga kýs 9 manna úthlutunarnefnd Uppbyggingarsjóðs. Hlutverk nefndarinnar er að fara yfir umsóknir og velja þau verkefni sem styrkt verða á grundvelli faglegs mats. Niðurstaða úthlutunarnefndar er lögð fyrir stjórn Fjórðungssambands Vestfirðinga til staðfestingar áður en til úthlutunar kemur. Þeir sem sitja í úthlutunarnefnd skulu gæta að hæfisreglum við ákvarðanatöku og víkja sæti ef fyrirbyggjandi aðstæður eru til þess fallnar að draga úr trú á óhlutdrægni við val á verkefnum. Við mat á vanhæfi skal hafa til hliðsjónar ákvæði stjórnsýslulaga nr. 37/1993 og 20 gr. sveitarstjórnarlaga nr. 138/2011.

4. Umsækjendur

Umsækjendur skulu vera lögráða einstaklingar, félagasamtök, fyrirtæki, stofnanir eða sveitarfélög á Vestfjörðum. Umsækjendur skulu hafa íslenska kennitölu. Heimilt er að styrkja verkefni sem framkvæmd eru í fjórðungnum og unnin að hluta eða öllu leyti í samvinnu við vestfirsku aðila, þótt aðalumsækjandi sé búsettur utan svæðis. Stofnanir, opinber hlutafélög og samtök í meirihlutaeigu ríkis eða sveitarfélaga skulu að jafnaði ekki vera leiðandi aðili í verkefnum styrktum af Uppbyggingarsjóði. Umsækjendur um stofn- og rekstrarstyrki til menningarstofnana skulu vera lögaðilar.

5. Framkvæmd

Starfsmenn Fjórðungssambands Vestfirðinga, í umboði stjórnar sambandsins, sjá um að auglýsa eftir umsóknum, í samvinnu við Atvinnuþróunarfélag Vestfjarða og Vestfjarðastofu. Þeir taka við umsóknum og ganga frá þeim í hendur úthlutunarnefndar. Að úthlutun lokinni sjá þeir um samskipti við styrkþega, s.s. gerð samninga, útborgun styrkja og eftirfylgni.

6. Auglýsing

- a) Á árinu 2018 verður ein aðalúthlutun, með umsóknarfresti til og með. 21 nóvember 2017.
- b) Auglýsa skal eftir umsóknum um styrki á heimasíðu Fjórðungssambands Vestfirðinga og í vestfirskum vefmiðlum, auk þess sem auglýst verði með dreifibréfi inn á heimili og fyrirtæki á svæðinu.

7. Umsóknir

Umsóknum skal skila á rafrænu formi á vef Fjórðungssambands Vestfirðinga. Í umsókninni skal vera greinargóð lýsing á verkefninu og markmiðum þess, verk- og tímaáætlun, ítarleg fjárhagsáætlun (kostnaðar- og tekjuáætlun) og upplýsingar um umsækjendur. Umsækjendur þurfa að hafa skilað loka- eða framvinduskýrslum vegna fyrri styrkja, áður en sótt er um til framhaldsverkefnis. Umsókn þarf að fylgja yfirlýsing umsækjanda að hann hafi ekki fengið og muni ekki þiggja meira en 200 þúsund evrur í stuðning frá opinberum aðilum yfir hvert þriggja ára tímabil, samanber 3 gr. reglugerðar framkvæmdastjórnar ESB nr. 1407/2013 frá 18. desember 2013.

8. Áherslur

Við úthlutun 2018 er litið sérstaklega til umsókna sem uppfylla eitt eða fleiri eftirtalinna skilyrða:

- a) Verkefni sem efla nýsköpun og atvinnuþróun á svæðinu
- b) Verkefni sem stuðla að vöru- og gæðapróun í starfandi fyrirtækjum
- c) Verkefni sem mynda atvinnutækifæri og auka fagmennsku á sviði lista og menningar
- d) Verkefni sem efla samstarf, ýmist á milli svæða, listgreina, fyrirtækja eða rannsóknaraðila
- e) Verkefni sem styðja við uppbyggingu og eflingu menningartengdrar ferðaþjónustu
- f) Verkefni sem skapa störf fyrir háskólamenntaðar konur og ungt fólk á svæðinu
- g) Atvinnuþróunar- og nýsköpunarverkefni sem eru gjaldeyrisskapandi
- h) Atvinnuþróunarverkefni sem eru á sviði líftækni

9. Styrkir

- a) Uppbyggingarsjóður er samkeppnissjóður sem Fjórðungssamband Vestfirðinga hefur umsjón með. Umsóknum um styrki þarf að skila á þar til gerðum eyðublöðum og eru þær metnar með faglegum hætti út frá trúverðugleika og gæðum umsókna og verkefna, afrakstri

þeirra og þeim áhrifum sem þau hafa á atvinnuþróun, nýsköpun, mannauð, menningar- og mannlíf í fjórðungnum.

b) Heimilt er að sækja um framlag til allt að tveggja ára.

c) Styrkir úr Uppbyggingarsjóði þurfa að falla að markmiðum Sóknaráætlunar Vestfjarða 2015-2019. Þeir eru þrennskonar: Verkefnastyrkir til atvinnuþróunar og nýsköpunar, verkefnastyrkir á sviði menningar og stofn- og rekstrarstyrkir til menningarstofnana

d) Styrkir úr Uppbyggingarsjóði geta numið allt að 50% af áætluðum heildarkostnaði verkefnisins.

e) Birtur verður opinberlega listi yfir styrkþega og styrkuppþæð, heiti verkefnis og stutt lýsing á því.

10. Samningur

Fjórðungssamband Vestfirðinga og styrkþegi gera með sér skriflegan samning sem m.a. kveður á um fyrirkomulag greiðslna, réttindi og skyldur aðila, tímaramma, skil á skýrslum og eftirfylgni. Að öðru leyti ber styrkþega að veita Fjórðungssambandinu upplýsingar um framkvæmd verkefnisins og aðgang að bókhaldsgögnum þegar og ef eftir því er leitað.

11. Greiðslur styrkja

a) Styrkir sem eru 1,2 milljón króna eða lægri: Greiða má styrkinn í tvennu lagi. Fyrri hlutinn, allt að 50%, er greiddur við upphaf verkefnis þegar styrkhafi hefur staðfest að vinnan sé hafin og samningur hefur verið gerður um fyrirkomulag. Lokagreiðsla fer fram þegar verkefni er lokið, styrkhafi hefur skilað fullnægjandi lokaskýrslu ásamt umbeðnum gögnum og lokaskýrsla verið samþykkt.

b) Styrkir sem eru hærri en 1,2 milljón króna: Við undirritun samnings greiðast allt að 40% samningsuppþæðar fyrir hvert ár og heimilt er að greiða allt að 40% styrkuppþæðar við skil á framvinduskýrslu. Lokagreiðsla að lágmarki að upphæð 20% fer fram að verkefni loknu þegar styrkhafi hefur skilað fullnægjandi lokaskýrslu. Ef um samning til tveggja ára sjá lið c).

c) Annað ár (ef um tveggja ára samning er að ræða): Fyrsta greiðsla, 40% af greiðslu seinna ársins, eftir 15. febrúar, enda hafi ársskýrslu verið skilað fyrir 15. febrúar. Önnur greiðsla, 40% af greiðslu seinna ársins, eftir 15. ágúst, enda hafi verið skilað ársreikningi fyrra árs. Þriðja og lokagreiðsla seinna ársins, 20% af greiðslu ársins, við skil lokaskýrslu. Henni skal skilað eigi síðar en 15. febrúar.

d) Ef ekkert verður af verkefni sem fær styrkvilyrði fellur styrkurinn frá Uppbyggingarsjóði niður. Verði verulegar breytingar á verkefni þarf að sækja um frest skriflega til Uppbyggingarsjóðs, ella er styrkurinn afturkræfur að hluta eða öllu leyti.

e) Miðað er við að verkefni sem Uppbyggingarsjóður styrki komi til framkvæmda innan árs frá úthlutun, nema um styrk til tveggja ára sé að ræða, þá sé því lokið innan tveggja ára frá úthlutun. Skila þarf framvinduskýrslu og formlegri beiðni um frestun ef óskað er eftir að sá tímarammi sé lengdur. Að öðrum kosti má styrkþegi búast við að styrkur verði felldur niður.

f) Samningar og greiðslur miðast við almanaksár. Í öllum tilfellum er heimilt að sameina greiðslur hafi skilyrðum beggja greiðslna verið fullnægt.

12. Styrkhæf verkefni og styrkhæfur kostnaður

Eftirfarandi reglur gilda um styrkhæfan kostnað í framlögum Uppbyggingarsjóðs:

a) Launakostnaður umsækjenda skal miðast við útborguð laun að viðbættum launatengdum gjöldum samkvæmt almennum kjarasamningum. Ekki er heimilt að nota útseldan taxa til viðmiðunar við útreikning launakostnaðar í umsóknum. Hámarkstímakaup í útreikningi eigin vinnuframlags skal þannig vera 3.500 kr/klst.

b) Ekki er veittur styrkur vegna kostnaðar sem fallið hefur til fyrir 1. janúar 2018 vegna þeirra verkefna eða starfsemi sem sótt er um styrki til á árinu 2018.

13. Uppbyggingarsjóður fjármagnar ekki:

a) Fjárfestingar í fyrirtækjum, kaup á lóðum eða húsnæði

b) Ekki er veittur styrkur til að kaupa tölvur eða almennan skrifstofubúnað, nema um stofn- og rekstrarstyrk sé að ræða.

c) Ekki eru veittir styrkir til skráningar menningarminja, forvörslu safngripa, hefðbundinna bæjarhátíða, hefðbundinnar starfsemi íþróttafélaga, hefðbundins safnaðarstarfs eða hefðbundins menningarstarfs innan skóla.

d) Ekki eru veittir styrkir sem eingöngu renna til rannsóknarverkefna, frekar er litið til verkefna sem snúast um hagnýtingu rannsóknarniðurstaðna eða miðlunar á afrakstri rannsókna.

14. Ábyrgð

Umsækjandi ábyrgist að fullnægjandi leyfi séu fyrir framkvæmd verkefnisins og notkun heimilda ef þarf og ber ábyrgð á öllum þáttum verkefnisins, framkvæmd þess og afrakstri.

15. Trúnaður

Umsækjendum er heitið trúnaði varðandi umsóknir þeirra.

16. Endurskoðun:

Verklags- og úthlutunarreglur þessar skal endurskoða árlega, áður en auglýst er að nýju eftir styrkumsóknum til Uppbyggingarsjóðs.

Samþykkt á stjórnarfundum FV 19. október 2017